



EGUNEKO DIANAK




Xabier Euzkitze

Joan zen igandean Zumarragan jokatu zen azken kanporaketan Xabier Pérez 'Euzkitze' sailkatu zen final-aurrekoetara, 732,5 punturakin. / 24-25



Frantziako Gobernua

Aterberik gabe zeuden hiru lagun hil zituen hotzak joan zen asteburuan Frantzian. Emmaus lagundiak gogor salatu ditu Gobernuak aterberik gabekoei laguntzeko hartu dituen neurri ahulak. / 15



Ultraeskuindarrak

Herenegun ultraeskuineko skinhead edo kaskamotzen erasoa jasan zuen Jesus Sanchez Rodriguez 27 urteko gazte madrildarra atzo arratsaldean hil zen Madrilgo Ospitale Klinikoan. Burua ireki zioten kolpeka. / 15

Jon Garcia: «Eibarko gazteriak ezingo du damaskinatua ezagutu, hiltzorian baitago»

MARI JOSE TELLERIA / EIBAR

Lanik gabe geratu zenean eman zuen izena Jon Garciak zabaldu berria zen Damaskinatu Eskolan. «Aita eskopetagilea, izeko damaskinagilea, bizilaguna grabatzailea... Bizitzari aurre egiteko alternatiba bat zen, baina ez edozein modutako irtenbidea; Eibarko kulturak, idiosinkrasiak, ohiturak, tradizioak ere bultzatu gintuen honako ogibide hau aukeratzera», adierazi digu Jon Garciak, Angel Ledo lagunak albotik buruarekin baietz dioen bitartean.

Damaskinatuak pisu handia du Eibarren, baina jendeak ez dio merzei duen garrantzia ematen, ezta erakundeek ere. «Gure promozioa azkenetariko bat izan da; lanbide honek etorkizunik ez duela zioten eta eskola desagertarazi zuten. Eibarko gazteriak ezin izango du ezagutu damaskinatua, bere iragana; alde batetik, artisautza hiltzorian dagoelako eta, bestetik, museorik ere ez dagoelako», salatu dute damaskinatugileek.

Gaur egun zortzi lagunek dihardute antzinako teknika hau lantzen Eibarren, Jon, Angel eta sei emakumezko. «Margotzen jakitea eta trebea izatea besterik ez da behar honetan aritzeko. Gu eskolan hasi ginen, baina asko ikasi dugu eguneroko lanean; teknikak sakondu, forma berriak asmatu, materialak aztertu...». Hiru urte egin zituzten eskolan, egunero lau ordu ikasten. Jonek, honezaz gain, beste artisautza batzuk lantzen ditu: «Garai bateko damaskinatugileek ez zituzten oinarriak egiten, bazeuden horretaz arduratzen ziren lantegitxoak. Orain guk geuk egin behar izaten dugu hori



Eserita dago Jon. Atzekoa Angel Ledo da.

JULIO CALLEJA

SOSLAIA

Lan bakarrek

Jendeak ez du ulertzen nola dagoen egina, eta bezeroa hezi beharrean izaten dira, erakustaldietan lanean arituz. Dirutza handia kosta arren, merkea dela onartzen du publikoak, lan handia dela ikusita. Oinarria altzairuzkoa du eta bertan 24 kilateko urre haria sartuz lortzen dira irudiak. Baina diseinuak eta materialak baldintzatzen dute prozesua. Eskuz egiten da dena; horregatik, serie berberekoak izan arren, obra bi ezin dira berdinak izan. Hori da Toledoko damaskinatuarekin dituen aldeetarikoa bat.


eta erremintak ere guk eginikoak dira», esan du Paulino Larrañaga irakasle izan zuenak.

Obra handiak egitea gustatzen zaio, baina 24 kilateko urrea oso garestia denez, zaila izaten da halako lanak saltzea. Horregatik, oparitarako bitxiak egin behar izaten ditu. «Bestelako lanak baino errazago egin eta saltzen dira. Gainera, forma klasikoekin apurtzeko aukera eskaintzen du. Irudimenak, fantasiak, saioak... badute lekua pultsera, belarritako, kutxa txiki eta halakoe-tan».

Gauza berriak asmatzea gustatzen zaio eta artisautza tradizionala garatzerik badagoela dio. «Diseinu aldetik eredu berriak proposatu ditugu, uste baitugu betiko formak eta irudiak ez datozela bat gaur egungo modarekin, eta jendeak pozik onartu ditu. Jaso ditugun kritikak behintzat oso onak izan dira eta, sasijakintun asko dagoela kontutan izanda, zeresan handia du horrek. Hemen inguruan, inoiz ez dugu erakusketarik egin, beti baitago sasimaisuren bat, eta ez zaigu gustatzen tontakeriak entzutea», adierazi du gogor, tradizioaren zaindari den honek. Etxe askotan damaskinatuak hautsez beterik daudela eta jendeak ez dakielaz nolako balioa duten gehitu du.

Reus, Samur, Epelette, Bades, Camus, Ziburu eta hainbat lekutaraino joan dira euren lanak erakustera. «Jendea liluraturik geratzen da. Askok, pintaturik ez daudela ikusten dutenean, ezin izaten dute sinistu. Guk gainetik erakusten dizkiegu eta galdera asko egiten dute. Baina ez ditugu gure trukoak azaltzen, oso ondo gorderik baitauzkagu horiek. Ez dugu kopiatuak izaterik nahi!».

irrimarra



© Jon Zabaleta

❑ **KALEKO HIRU HAUR HIL ZITUZTEN BURUAN** tiro eginda Brasilgo Fortaleza hirian, iragan igande goizean. Lekuko batek kontatu zuenez, bi polizia militarrek atxilotu eta galdekatu egin zituzten lurrean eserita zeuden umeak. Horiek joan eta bost minutura, bi gizonetako iritsi ziren motorrez eta tirokatu egin zituzten. Unicefek bezala, nazioarteko erakunde humanitarioek ere behin eta berriro salatu dute Brasilgo hiri handietan gertatzen dena: egunero lau ume hiltzen dituzte batez beste estermínio taldeetako kideek; merkatariek ordaindutako poliziak ei dira gehienak.

❑ **OSAKIDETZAKO TXARTELEKIN NEGOZIOA!** Bizkaiko Osakidetza Zuzendaritzako iturriek atzo salatu zuten, Bilboko zenbait etxebizitzatan dirua eskatzen ari dira Osakidetza txartela eskura eramatearen truke. Zentzu honetan, txartela «anbulatorio, osasun zentro edo kontsultorioetan «bakarrik» jasotzen dela ohartarazi zuten. Norbaitek hala eskatuz gero, etxera postaz bidaltzen dute, «baina horren truke dirua eskatu gabe».

❑ **BOST DINAR (6,8 PEZETA, 0,3 libera)** kosta zaie irakiarrei autoaren depositoa betetzea, gasolina litroak 0,07 dinar balio baitu. Gainontzeko gaiak oso garesti daude: ur litroak, zortzi dinar balio du. «Erregaia ezin edatea penagarria da!», damu dute herriarrek. Kuwaiten inbasioaz geroztik eta nazioarteak ezarritako zigorraren ondorioz, petrolioak esportatzerik ez du Irakek eta moneta baliogabetuz joan da.

❑ **HOTZAK LAU** lagun hil zituen Moskun atzo eta bederatzik izozketak izan zituzten. Urtaro honetan ezohizkoa bada ere, zero azpitik 20 gradura iritsi zen termometroa. Medikuen esanetan, hotz horrekin nahiko da ordu erdi kale gorrian geldirik izatea hotzak hiltzeko.

LERRO GUTXITAN

Partidu erabakiorra Bilboko Deportibon

Salaberria-Elkoro eta Balerdi-Galarza III bikoteak aurrez aurre izango dira datorren ostiralean Bilboko Deportivo pilotalekuan. Irabaziz gero, Eskuz Binakako Txapelketako finalerdietarako txartela ia ziurtatuta izango lukete Salaberria eta Elkoro. Balerdi eta Galarza nafarrei, berriz, ezinbestekoa zaie garaipena finalerdietara sailkatu ahal izateko.

ONCE

ASTELEHENA

63.624

ASTEARTEA

ASTEAZKENA

OSTEGUNA

OSTIRALA

KUPOITZARRA